

四庫全書

史部

欽定四庫全書

史部

唐書卷二百十七上

下

詳校官編修臣錢樾

洗馬臣王坦修覆勘

覆校官庶吉士臣徐立綱

校對官中書臣陳林

謄錄監生臣王永年

欽定四庫全書

唐書卷一百一十七上

宋端明殿學士 宋祁撰

列傳第一百四十二上

回鶻

回紇其先匈奴也俗多乘高輪車元魏時亦號高車部
或曰敕勒訛為鐵勒其部落曰袁紇薛延陀契苾羽都
播骨利幹多覽葛僕骨拔野古同羅渾思結斛薛奚結

阿跌白雪凡十有五種皆散處磧北袁紇者亦曰烏護
曰烏紇至隋曰韋紇其人驍彊初無酋長逐水草轉徙
善騎射喜盜鈔臣于突厥突厥資其財力雄北荒大業
中處羅可汗攻脅鐵勒部裒責其財既又恐其怨則集
渠豪數百悉阬之韋紇乃并僕骨同羅拔野古叛去自
為俟斤稱回紇回紇姓藥羅葛氏居薛延陀北娑陵水
上距京師七千里衆十萬勝兵半之地磧鹵畜多大足
羊有時健俟斤者衆始推為君長子曰菩薩材勇有謀

嗜獵射戰必身先所向輒摧破故下皆畏附為時健所
逐時健死部人賢菩薩立之母曰烏羅渾性嚴明能決
平部事回紇繇是寢盛與薛延陀共攻突厥北邊頡利
遣欲谷設領騎十萬討之菩薩身將五千騎破之馬鬣
山追北至天山大俘其部人聲震北方繇是附薛延陀
相脅齒號活頡利發樹牙獨樂水上貞觀三年始來朝
獻方物突厥已亡惟回紇與薛延陀為最雄彊菩薩死
其酋胡祿俟利發吐迷度與諸部攻薛延陀殘之并有

其地遂南踰賀蘭山境諸河遣使者獻款太宗為幸靈
州次涇陽受其功於是鐵勒十一部皆來言延陀不事
大國以自取亡其下靺鞨烏散不知所之今各有分地
願歸命天子請置唐官有詔張飲高會引見渠長等以
唐官官之凡數千人明年復入朝乃以回紇部為瀚海
多覽葛部為燕然僕骨部為金微拔野古部為幽陵同
羅部為龜林思結部為廬山皆號都督府以渾為臯蘭
州斛薛為高闕州阿跌為鷄田州契苾羽為榆溪州奚

結為鷄鹿州思結為蹕林州白雪為賓顏州其西北結
骨部為堅昆府北骨利幹為玄闕州東北俱羅勃為燭
龍州皆以首領為都督刺史長史司馬即故單于臺置
燕然都護府統之六都督七州皆隸屬以李素立為燕
然都護其都督刺史給玄金魚符黃金為文天子方招
寵遠夷作絳黃瑞錦文袍寶刀珍器賜之帝坐祕殿陳
十部樂殿前設高坵置朱提瓶其上潛泉浮酒自左閣
通坵趾注之瓶轉受百斛鐐盞回紇數千人飲畢尚不

能半又詔文武五品官以上祖飲尚書省中渠領共言
生荒陋地歸身聖化天至尊賜官爵與為百姓依唐若
父母然請於回紇突厥部治大涂號參天至尊道世為
唐臣乃詔磧南鵲鵲泉之陽置過郵六十八所具羣馬
湏肉待使客歲內貂皮為賦乃拜吐迷度為懷化大將
軍瀚海都督然私自號可汗署官吏壹似突厥有外宰
相六內宰相三又有都督將軍司馬之號帝更詔時健
俟斤它部為祁連州隸靈州都督白霄它部為居延州

吐迷度兄子烏紇烝吐迷度之妻遂與俱陸莫賀達干
俱羅勃謀亂而歸車鼻可汗二人者皆車鼻壻故烏紇
領騎夜劫吐迷度殺之燕然副都護元禮臣遣使給烏
紇許白為都督烏紇不疑即往謝因斬以徇帝恐諸部
攜解命兵部尚書崔敦禮持節臨撫贈吐迷度左衛大
將軍賻祭備厚擢其子婆閏左驍衛大將軍襲父所領
俱羅勃既入朝帝不遣阿史那賀魯之盜北庭婆閏以
騎五萬助契苾何力等破賀魯收北庭又從伊麗道行

軍總管任雅相等再破賀魯金牙山遷右衛大將軍從討高麗有功婆閨死子比栗嗣龍朔中以燕然都督府領回紇更號瀚海都護府以磧為限大抵北諸蕃悉隸之比栗死子獨解支嗣武后時突厥默啜方彊取鐵勒故地故回紇與契苾思結渾三部度磧徙甘涼間然唐常取其壯騎佐赤水軍云獨解支死子伏帝畲立明年助唐攻殺默啜於是別部移健頡利發與同羅靺鞨等皆來詔置其部於大武軍北伏帝畲死子承宗立涼州都

督王君奭誣暴其罪流死瀛州當此時回紇稍不循族
子瀚海府司馬護輸乘衆怨共殺君奭梗絕安西諸國
朝貢道久之奔突厥死子骨力裴羅立會突厥亂天寶
初裴羅與葛邏祿自稱左右葉護助拔悉蜜擊走烏蘇
可汗後三年襲破拔悉蜜斬頡跌伊施可汗遣使上狀
自稱骨咄祿毗伽闕可汗天子以為奉義王南居突厥
故地徙牙烏德隄山昆河之間南距西城千七百里西
城漢高闕塞也北盡磧口三百里悉有九姓地九姓者

曰藥羅葛曰胡咄葛曰咄羅勿曰貊歌息訖曰阿勿喃
曰葛薩曰斛嗚素曰藥勿葛曰奚那勿藥羅葛回紇姓
也與僕骨渾拔野古同羅思結契必六種相等夷不列
於數後破有拔悉蜜葛邏祿總十一姓並置都督號十
一部落自是戰常以二客部為先鋒有詔拜為骨咄祿
毗伽闕懷仁可汗前殿列仗中書令內案授冊使者使
者出門升輅至皇城門降乘馬幡節導以行凡冊可汗
率用此禮明年裴羅又攻殺突厥白眉可汗遣頓啜羅

達干來上功拜裴羅左驍衛員外大將軍斥地愈廣東
極室韋西金山南控大漠盡得古匈奴地裴羅死子磨
延啜立號葛勒可汗剽悍善用兵歲遣使者入朝肅宗
即位使者來請助討祿山帝詔燉煌郡王承寀與約而
令僕固懷恩送王因召其兵可汗喜以可敦妹為女妻
承寀遣渠領來請和親帝欲固其心即封虜女為毗伽
公主於是可汗自將與朔方節度使郭子儀合討同羅
諸蕃破之河上與子儀會呼延谷可汗恃其彊陳兵引

子儀拜狼麝而後見帝駐彭原使者葛羅支見恥班下
帝不欲使鞅鞅引升殿慰而遣俄以大將軍多攬等造
朝及太子葉護身將四千騎來惟所命帝因冊毗伽公
主為王妃擢承宗正卿可汗亦封承宗為葉護給四
節令與其葉護共將帝命廣平王見葉護約為昆弟葉
護大喜使首領達干等先到扶風見子儀子儀犒飲三
日葉護辭曰國多難我助討逆何敢食固命乃留既行
日賜牛四十角羊八百蹄米四十斛香積之戰陳澧上

賊詭伏騎於王師左將襲我僕固懷恩麾回紇馳之盡
翦其伏乃出賊背與鎮西北廷節度使李嗣業夾度之
賊大敗進收長安懷恩率回紇南蠻大食衆繚都而南
壁漣東進次陝西戰新店初回紇至曲沃葉護使將軍
鼻施吐撥裴羅旁南山東出搽賊伏谷中殲之營山陰
子儀等與賊戰傾軍逐北亂而卻回紇望見即踰西嶺
曳旗趨賊出其後賊反顧遂大潰追奔數十里人馬相
騰蹂死者不可計收仗械如丘嚴莊挾安慶緒棄東京

北度河回紇大掠東都三日姦人導之府庫窮殫廣平王欲止不可而耆老以繒錦萬疋賂回紇止不剽葉護還京師帝遣羣臣勞之長樂帝坐前殿召葉護升階席酋領於下宴且勞之人人賜錦繡繒器葉護頓首言留兵沙苑臣歸料馬以收范陽訖除殘盜帝曰為朕竭義勇成大事卿等力也詔進司空爵忠義王歲給絹二萬疋使至朔方軍受賜乾元元年回紇使者多彥阿波與黑衣大食酋閣之等俱朝爭長有司使異門竝進又使

請昏許之帝以幼女寧國公主下嫁即冊磨延啜為英
武威遠毗伽可汗詔漢中郡王瑀攝御史大夫為冊命
使以宗子右司郎中巽兼御史中丞為禮會使并以副
瑀尚書右僕射裴冕送諸境帝餞公主因幸咸陽數慰
勉主泣曰國方多事死不恨瑀至虜而可汗胡帽赭袍
坐帳中儀衛光嚴引瑀立帳外問曰王天可汗何屬瑀
曰從昆弟也時中人雷靈俊立瑀上又問立王上者為
誰瑀曰中人也可汗曰中人奴爾顧立即上乎靈俊趨

下於是引瑤入瑤不拜可汗曰見國君禮無不拜瑤曰
天子顧可汗有功以愛女結好比中國與夷狄昏皆宗
室子今寧國乃帝生女有德容萬里來降可汗天子壻
當以禮見安居受詔那可汗慙乃起奉詔拜受冊翌日
尊主為可郭瑤所齎賜物可汗盡與其牙下酋領瑤還
獻馬五百匹貂裘白氍毹等乃使王子骨噉特勒宰相帝
德等率騎三千助討賊帝因命僕固懷恩總之又遣大
首領蓋將軍與三女子謝昏并告破堅昆功明年骨噉

與九節度戰相州王師潰帝德等奔京師帝厚賜尉其
意乃還俄而可汗死國人欲以公主殉主曰中國人壻
死朝夕臨喪期三年此終禮也回紇萬里結昏本慕中
國吾不可以殉乃止然務面哭亦從其俗云後以無子
得還始葉護太子前得罪死故次子移地健立號牟羽
可汗其妻僕固懷恩女也始可汗為少子請昏帝以妻
之至是為可敦明年使大臣俱錄莫賀達干等入朝并
問公主起居使人通謁於延英殿代宗即位以史朝義

未滅復遣中人劉清潭往結好且發其兵比使者至回
紇已為朝義所誅曰唐祚有喪國無主且亂請回紇入
收府庫其富不貲可汗即引兵南寶應元年八月也清
潭齎詔至其帳可汗曰人言唐已亡安得有使邪清潭
為言先帝雖棄天下廣平王已即天子位其仁聖英武
類先帝故與葉護收二京破安慶緒者是與可汗素厚
且唐歲給回紇繒絹豈忘之邪是時回紇已踰三城見
州縣榛莽烽障無守有輕唐色乃遣使北收單于府兵

倉庫數以語凌靳清潭清潭密白帝回紇兵十萬向塞
朝廷震驚遣殿中監藥子昂迎勞且視軍遇于太原密
識其兵裁四千孺弱萬餘馬四萬與可敦偕來帝令懷
恩與回紇會因遣使上書請助天子討賊回紇欲入蒲
闐徑沙苑而東子昂說曰自寇亂來州縣殘虛供億無
所資且賊在東京若入井陘以取邢洛衛懷收賊財帑
乃鼓而南上策也不聽子昂曰然則趨懷太行道南據
河陽扼賊喉衿又不聽曰食太原倉粟石次陝與澤潞

河南懷鄭兵合回紇從之詔以雍王為天下兵馬元帥
進子昂兼御史中丞與右羽林衛將軍魏琚為左右廂
兵馬使中書舍人韋少華為元帥判官御史中丞李進
為行軍司馬東會回紇敕元帥為諸軍先鋒與諸節度
會陝州時可汗壁陝州北王往見之可汗責王不蹈舞
子昂辭曰王嫡皇孫二宮在殯禮不可以蹈舞回紇廷
詰曰可汗為唐天子弟於王叔父行也容有不蹈舞乎
子昂固拒即言元帥唐太子也將君中國而可蹈舞見

可汗哉回紇君臣度不能屈即引子昂進少華琚榜之
百少華琚一夕死王還營官軍以王見辱將合誅回紇
王以賊未滅止之於是懷恩與虜左殺為先驅朝義使
反間左殺執以獻與諸將同擊賊戰橫水走之進收東
都可汗使拔賀那賀天子獻朝義旗物雍王還靈寶可
汗屯河陽留三月屯旁人困於剝辱僕固瑒率回紇兵
與朝義挈戰蹀血二千里梟其首河北悉平懷恩道相
州西山崢嶸口還屯可汗出澤潞與懷恩會道太原去初

回紇至東京放兵穀剽人皆遁保聖善白馬二祠浮屠避之回紇怒火浮屠殺萬餘人及是益橫詬折官吏至以兵夜斫舍光門入鴻臚寺方其時陝州節度使郭英乂留守東都與魚朝恩及朔方軍驕肆因回紇為暴亦掠汝鄭間鄉不完廬皆蔽紙為裳虐于賊矣帝念少華等死故贈少華左散騎常侍琚揚州大都督賜一子六品官於是冊可汗曰頡咄登里骨啜蜜施合俱錄英義建功毗伽可汗可敦曰娑墨光親麗華毗伽可敦以左

散騎常侍王翊使即其牙命之自可汗至宰相共賜實
封二萬戶又以左殺為雄朔王右殺寧朔王胡祿都督
金河王拔覽將軍靜漠王十都督皆國公永泰初懷恩
反誘回紇吐蕃入寇俄而懷恩死二虜爭長回紇首領
潛詣涇陽見郭子儀請改事子儀率麾下叩回紇營回
紇曰願見令公子儀出旗門回紇曰請釋甲子儀易服
酋長相顧曰真是公矣時李光進路嗣恭介馬在側子
儀示酋長曰此渭北節度使某朔方軍糧使某酋長下

馬拜子儀亦下見之虜數百環視子儀麾下亦至子儀
麾下左右使卻且命酒與飲遺以纏頭綵三千名可汗弟
合胡祿等持手因讓曰上念回紇功報爾固厚何負而
來今即與汝戰何遽降也我將獨入爾營雖殺我吾將
士能擊汝酋長讐服曰懷恩詭我曰唐天子南走公見
廢是以來今天可汗在公無恙吾等願還擊吐蕃以報
厚恩然懷恩子可敦弟也願赦死於是子儀持酒胡祿
請盟而飲子儀曰唐天子萬歲回紇可汗亦萬歲二國

將相如之有如負約身死行陳家屠戮方時虜宰相磨
咄莫賀達千頓等聞言皆奪氣酒至其所輒曰無易公
誓始虜有二巫言此行必不戰當見大人而還及是相
顧笑曰巫不吾紿也朔方先鋒兵馬使白元光合回紇
兵於靈臺會雪雰嚴晦吐蕃閉營撤備乃縱擊之斬首
五萬級生禽萬人獲馬橐它牛羊收所俘唐戶五千僕
固名臣降合胡祿都督等二百人皆來朝賜與不可計
子儀以名臣見名臣懷恩兄子銳將也大厯三年光親

可敦卒帝遣右散騎常侍蕭昕持節弔祠明年以懷恩
幼女為崇徽公主繼室兵部侍郎李涵持節冊拜可敦
賜繒綵二萬是時財用屈稅公卿贏橐它給行宰相餞
中渭橋回紇之留京師者曹輩掠女子於市引騎犯舍
光門皇城皆闔詔劉清潭慰止復出暴市物奪長安令
邵說馬有司不敢何詰自乾元後益負功每納一馬取
直四十縑歲以數萬求售使者相躡留舍鴻臚駘弱不
可用帝厚賜欲以愧之不知也復以萬馬來帝不忍重

煩民為償六千十年回紇殺人橫道京兆尹黎幹捕之
詔貸勿劾又刺人東市縛送萬年獄首領劫取囚殘獄
吏去都人厭苦十三年回紇襲振武攻東陁入寇太原
河東節度使鮑防與戰陽曲防敗績殘殺萬人代州都
督張光晟又戰羊虎谷破之虜乃去德宗立使中人告
喪且修好時九姓胡勸可汗入寇可汗欲悉師向塞見
使者不為禮宰相頓莫賀達干曰唐大國無負於我前
日入太原取羊馬數萬比及國亡耗略盡今舉國遠關

有如不捷將安歸可汗不聽頓莫賀怒因擊殺之并屠其支黨及九姓胡幾二千人即自立為合骨咄祿毗伽可汗使長建達干從使者入朝建中元年詔京兆少尹源休持節冊頓莫賀為武義成功可汗始回紇至中國常參以九姓胡往往留京師至千人居貲殖產甚厚會酋長突董翳蜜施大小梅錄等還國裝橐係道留振武三月供擬珍豐費不貲軍使張光晟陰伺之皆盛女子以橐光晟使驛吏刺以長錐然後知之已而聞頓莫賀

新立多殺九姓胡人懼不敢歸往往亡去突董察視嚴
亟羣胡獻計於光晟請悉斬回紇光晟許之即上言回
紇非素彊助之者九胡爾今其國亂兵方相加而虜利
則往財則合無財與利一亂不振不以此時乘之復歸
人與幣是謂借賊兵資盜糧也乃使裨校陽不禮突董
果怒鞭之光晟因勒兵盡殺回紇羣胡收橐它馬數千
繒錦十萬且告曰回紇扶大將謀取振武謹先誅之部
送女子還長安帝召光晟還以彭令方代之遣中人與

回紇使聿達干往言其端因欲與虜絕敕源休俟命太
原明年乃行因歸突董等四喪突董可汗諸父也源休
至可汗令大臣具車馬出迎其大相頡干迦斯踞坐責
休等殺突董事休言彼自與張光晟鬪死非天子命又
曰使者皆負死罪唐不自戮何假手於我邪良久罷去
休等幾死留五旬卒不見可汗可汗傳謂休曰國人皆
欲爾死我獨不然突董等已亡今又殺爾猶以血濯血
徒益汙吾以水濯血不亦善乎為我言有司所負馬直

一百八十萬可速償我遣散支將軍康赤心等隨休來
朝帝隱忍賜以金繒後三年使使者獻方物請和親帝
蓄前恚未平謂宰相李泌曰和親待子孫圖之朕不能
已泌曰陛下豈以陝州故憾乎帝曰然朕方天下多難
未能報且毋議和泌曰辱少華等乃牟羽可汗也知陛
下即位必償怨乃謀先苦邊然兵未出為今可汗所殺
矣今可汗初立遣使來告垂髮不翦待天子命而張光
晟殺突董等雖幽止使人然卒完歸則為無罪矣帝曰

卿言則然顧朕不可負少華等奈何泌曰臣謂陛下不負少華少華負陛下且北虜君長身赴難陛下在藩春秋未壯而輕度河入其營所謂冒豺虎之場也為少華等計當先定會見禮臣猶危之奈何子然赴哉臣昔為先帝行軍司馬方葉護來先帝祇使宴於府及議征討則不見也葉護邀臣至營帝不許使好謂曰主當勞客客反勞主邪東收京師約曰土地人衆歸我玉帛子女予回紇戰勝葉護欲大掠代宗下馬拜之回紇乃東向

洛臣猶恨以元帥拜葉護於馬前為左右過然先帝曰
王仁孝足辦朕事下詔尉勉葉護乃年羽諸父也年羽
之來陛下以元子不拜於帳下而可汗不敢少有失於
陛下則陛下未嘗屈矣先帝拜葉護全京城陛下乃不
拜可汗固伸威於虜何恨焉然計香積陝州事以屈已
為是乎伸威為是乎藉令少華等以陛下見可汗閉壁
五日與陛下張飲天下豈不寒心哉而天助威神使豺
狼馴服年羽母捧陛下以貂裘叱左右促命騎躬送出

營此少華等負陛下也假今年羽為有罪則今可汗已殺之立者乃牟羽從父兄是為有功渠可忘之邪且回紇可汗銘石立國門曰唐使來當使知我前後功云今請和必舉部南望陛下不之答其怨必深願聽昏而約用開元故事如突厥可汗稱臣使來者不過二百市馬不過千不以唐人出塞亦無不可者帝曰善乃許降公主回紇亦請如約詔咸安公主下嫁又詔使者合闐達干見公主於麟德殿使中謁者齎公主畫圖賜可汗明

年可汗遣宰相跌跌都督等衆千餘并遣其妹骨咄祿毗伽公主率大酋之妻五十人逆主且納聘跌跌至振武為室韋所鈔戰死有詔其下七百皆聽入朝舍鴻臚寺御延喜門見使者是時可汗上書恭甚言昔為兄弟今墜半子也陛下若惠西戎子請以兵除之又請易回紇曰回鶻言捷鷲猶鶻然帝欲饗回鶻公主問禮於李泌對曰肅宗於燉煌王為從祖兄回鶻妻以女見帝於彭原獨拜廷下帝呼曰婦而不名嫂也當艱虞時方藉

其用猶以臣之況今日乎於是引回鶻公主入銀臺門
長公主三人候諸內譯史傳導拜必答揖與進帝御祕
殿長公主先入侍回鶻公主入拜謁已內司賓導至長
公主所又譯史傳問乃與俱入至宴所賢妃降階俟回
鶻公主拜賢妃答拜又拜名已由西階升乃坐有賜則
降拜非帝賜則避席拜妃公主皆答拜訖歸凡再饗帝
又盡建咸安公主官屬視王府以嗣滕王湛然為昏禮
使右僕射關播護送且將冊書拜可汗為汨咄祿長壽

天親毗伽可汗公主為智惠端正長壽孝順可敦貞元
五年可汗死子多邏斯立國人號泮官特勒以鴻臚卿
郭鋒持節冊拜愛登里邏汨沒蜜施俱錄毗伽忠貞可
汗初安西北廷自天寶末失闕隴朝貢道隔伊西北廷
節度使李元忠四鎮節度留後郭昕數遣使奉表皆不
至貞元二年元忠等所遣假道回鶻乃得至長安帝進
元忠為北廷大都護昕為安西大都護自是道雖通而
虜求取無涖沙陀別部六千帳與北廷相依亦厭虜裒

索至三葛祿白眼突厥素臣回鶻者尤怨苦皆密附吐蕃故吐蕃因沙陀共寇北廷頡干迦斯與戰不勝北廷陷於是都護楊襲古引兵奔西州回鶻以壯卒數萬召襲古將還取北廷為吐蕃所擊大敗士死大半迦斯奔還襲古挈餘衆將入西州迦斯給曰第與我俱歸當使公還唐襲古至帳殺之葛祿又取深圖川回鶻大恐稍南其部落以避之是歲可汗為少可敦葉公主所毒死可敦亦僕固懷恩之孫懷恩子為回鶻葉護故女號葉

公主云可汗之弟乃自立迦斯方攻吐蕃其大臣率國人共殺篡者以可汗幼子阿噉嗣迦斯還可汗等出勞皆俯伏言廢立狀惟大相生死之悉發郭鋒所賜器幣餉迦斯可汗拜且泣曰今幸得繼絕仰食於父也迦斯以其柔屈乃相持哭遂臣事之以器幣悉給將士無所私其國遂安遣達北特勒梅錄將軍來告且聽命詔鴻臚少卿庾鋌冊阿噉為奉誠可汗俄以律支達干來告少寧國公主之喪主榮王女也始寧國下嫁又以媵之

寧國後歸因留回鶻中為可敦號少寧國歷配英武英
義二可汗至天親可汗時始居外其配英義生二子皆
為天親所殺是歲回鶻擊吐蕃葛祿於北廷勝之且獻
俘明年使藥羅葛炁來朝炁本唐人呂氏為可汗養子
遂從可汗姓帝以其用事賜賚殊優拜檢校尚書右僕
射十一年可汗死無子國人立其相骨咄祿為可汗以
使者來詔祕書監張薦持節冊拜愛滕里邏羽錄沒蜜
施合胡祿毗伽懷信可汗骨咄祿本跌跌氏少孤為大

首領所養辯敏材武當天親時數主兵諸酋尊畏至是以藥羅葛氏世有功不敢自名其族而盡取可汗子孫內之朝廷永貞元年可汗死詔鴻臚少卿孫杲臨弔冊所嗣為滕里野合俱錄毗伽可汗元和初再朝獻始以摩尼至其法日晏食飲水茹葷屏湮酪可汗常與共國者也摩尼至京師歲往來西市商賈頗與囊橐為姦三年來告咸安公主喪主歷四可汗居回鶻凡二十一歲無幾可汗亦死憲宗使宗正少卿李孝誠冊拜愛登里

羅汨蜜施合毗伽保義可汗閱三歲使者再朝遣伊難
珠再請昏未報可汗以三千騎至礪鵜泉於是振武以
兵屯黑山治天德城備虜禮部尚書李絳奏言回鶻盛
彊北邊空虛一為風塵則弱卒非抗敵之夫孤城為不
守之地儻陛下懷此增甲兵飭城壘中夏長策生人大
幸也臣觀今日處置未得其要夫邊憂有五請歷言之
北狄貪沒唯利是視比進馬規直再歲不至豈厭繒帛
利哉殆欲風高馬肥而肆侵軼故外攘內備必煩朝廷

一可憂兵力未完斥候未明戈甲未備城池未固飾天德則虜必疑虛西城則磧道無倚二可憂夫城保要害攻守險易當謀之邊將今乃規河塞之外裁廟堂之上虜猝犯塞應接失便三可憂自修好以來山川形勝兵戍滿虛虜皆悉之賊掠諸州調發在旬朔外其係累人畜在旦夕內比王師至則虜已歸寇能久留役亦轉廣四可憂北狄西戎素相攻討故邊無虞今回鶻不市馬若與吐蕃結約解讐則將臣閉壁憚戰邊人拱手受禍

五可憂又淮西吳少陽垂死可乘其變諸道興發役且十倍臣謂宜聽其昏使守蕃禮所謂三利也和親則烽燧不驚城堞可治盛兵以畜力積粟以固軍一也既無北顧憂可南事淮右申令於垂盡之寇二也北虜恃我威則西戎怨愈深內不得寧國家坐受其安寇掠長息三也今舍三利取五憂甚非計或曰降主費多臣謂不然我三分天下賦以一事邊今東南大縣賦歲二十萬緡以一縣賦為昏貲非損寡得大乎今惜昏費不與假

如王師北征兵非三萬騎五千不能扞且馳也又如保
十全之勝一歲輒罷其饋餉供擬豈止一縣賦哉帝不
聽

唐書卷二百十七上

唐書卷二百十七上考證

回鶻傳上契苾羽為榆溪州○榆溪州舊書作榆林溪
州

子比栗嗣○舊書作妹比栗毒

唐書卷二百十七上考證

欽定四庫全書

唐書卷二百十七下

宋端明殿學士宋祁撰

列傳第一百四十二下

回鶻

回鶻之請昏有司度費當五百萬帝方內討彊節度故遣宗正少卿李誠太常博士殷侑往諭不可穆宗立回鶻又使合達于等來固求昏許之俄而可汗死使者臨

冊所嗣為登囉羽錄沒密施句主毗伽崇德可汗可汗
已立遣伊難珠句錄都督思結等以葉護公主來逆女
部渠二千人納馬二萬橐它千四夷之使中國其衆未
嘗多此詔許五百人至長安餘留太原詔以太和公主
下降主憲宗女也帝為主建府以左金吾衛大將軍胡
証光祿卿李憲持節護送太府卿李說為昏禮使冊拜
主為仁孝端麗明智上壽可敦告于廟天子御通化門
餞主羣臣班辭于道公主出塞距回鶻牙百里可汗欲

先與主由間道私見胡証不可虜人曰昔咸安公主行之証曰天子詔我送公主授可汗今未見不可先也乃止於是可汗升樓坐東向下設毳幔以居公主請襲胡衣以一姆侍出西向拜已退即次被可敦服絳通裾大襦冠金冠前後銳復出拜已乃升曲輿九相分負右旋于廷者九降輿升樓與可汗聯坐東向羣臣以次謁可敦亦自建牙以二相出入帳中証等歸可敦大宴悲啼眷慕可汗厚贈使者是時裴度方伐幽鎮回鶻使渠將

李義節以兵三千佐天子平河北議者懲艾前患不聽
兵已及豐州使者厚賜乃去敬宗即位之年可汗死其
弟曷薩特勒立遣使者冊為愛登里囉汨沒密施合毗
伽昭禮可汗賜幣十二車文宗初又賜馬直絹五十萬
太和六年可汗為其下所殺從子胡特勒立使者來告
明年遣左驍衛將軍唐弘實與嗣澤王溶持節冊為愛
登里囉汨沒密施合句錄毗伽彰信可汗開成四年其
相掘羅勿作難引沙陀共攻可汗可汗自殺國人立盧

駁特勒為可汗方歲飢遂疫又大雪羊馬多死未及命
武宗即位以嗣澤王溶臨告乃知其國亂俄而渠長句
錄莫賀與黠戛斯合騎十萬攻回鶻城殺可汗誅掘羅
勿焚其牙諸部潰其相駁職與龐特勒十五部奔葛邏
祿殘衆入吐蕃安西於是可汗牙部十三姓奉烏介特
勒為可汗南保錯子山黠戛斯已破回鶻得太和公主
又自以李陵後與唐同宗故遣使者達干奉主來歸烏
介怒追擊達干殺之劫主南度磧邊人大恐進攻天德

城振武節度使劉沔屯雲伽關拒卻之宰相李德裕建言回鶻曩有功今飢且亂可汗無歸不可擊宜遣使者贍安之帝用兵部郎中李拭行邊刺狀於是其相赤心與王子唃沒斯特勒那頡啜將其部欲自歸而公主亦遣使者來言烏介已立因請命又大臣頡干伽思等表假振武居公主可汗帝乃詔右金吾衛大將軍王會持節慰撫其衆輸糧二萬斛不許借振武令中人好語開諭又詔使者持冊往潛稽其行須變明年回鶻奉主至

漠南入雲朔剽橫水殺掠甚衆轉側天德振武間盜畜
牧自如乃召諸道兵合計唃沒斯以赤心奸桀難得要
領即密約天德戍將田牟誘赤心斬帳下那頡斂收赤
心衆七千帳東走振武大同因室韋黑沙南闚幽州節
度使張仲武破之悉得其衆那頡斂走烏介執而殺之
然烏介兵尚彊號十萬駐牙大同北閭門山而特勒龐
俱遮阿敦寧等凡四部及將軍曹磨你衆三萬因仲武
降唃沒斯亦附使者送欵帝欲使助可汗復國而可汗

已攻雲州劉沔與戰敗績唃沒斯率三部及特勒大酋
二千騎詣振武降詔拜唃沒斯為右金吾衛大將軍爵
懷化郡王以天德為歸義軍即拜歸義軍使阿歷支寧
邊郡公習勿啜昌化郡公烏羅思寧朔郡公並為冠軍
大將軍左威衛大將軍愛邪勿寧塞郡公為右領軍大
將軍加賜唃沒斯牙旗豹尾刀器諸物給其屬冠帶詔
宰相德裕采秦漢以來興殊俗忠效卓異者凡三十人
為異域歸忠傳寵賜之唃沒斯請留族太原率昆弟為

天子扞邊帝命劉沔為列舍雲朔間處其家可汗遣使者藉兵欲還故廷且假天德城帝不許可汗恚進略大同川轉戰攻雲州刺史嬰壁不敢出詔益發諸鎮兵屯太原以北嗾沒斯等既朝皆賜李氏名嗾沒斯曰思忠阿歷支曰思貞習勿啜曰思義烏羅思曰思禮愛邪勿曰弘順即拜歸義軍副使於是詔劉沔為回鶻南面招撫使張仲武東面招撫使思忠為西党項都將西南面招討使沔營鴈門又詔銀州刺史何清朝蔚州刺史契

苾通以蕃渾兵出振武與沔仲武合稍逼回鶻思忠數
深入諭降其下沔分沙陀兵益思忠河中軍以騎五百
益弘順沔進次雲州思忠屯保大柵率河中陳許兵與
回鶻戰敗之明年又為弘順所破沔與天德行營副使
石雄料勁騎及沙陀契苾等雜虜夜出雲州走馬邑抵
安衆塞逢虜與戰破之烏介方薄振武雄馳入夜穴壘
出鑿兵烏介驚引去雄追北至殺胡山烏介被創走雄
遇公主奉主還降特勒以下衆數萬盡收輜帑及所賜

詔書可汗收所餘往依黑車子詔弘順清朝窮躡弘順厚啗黑車子以利募殺烏介初從可汗亡者既不能軍往往詣幽州降留者皆飢寒痕夷裁數千黑車子幸其殘即殺烏介其下又奉其弟遏捻特勒為可汗帝詔德裕紀功銘石于幽州以夸後世思忠等以國亡皆願入朝見聽遂罷歸義軍擢思忠左監門衛上將軍兼撫王傅兩稟其奉賜第永樂坊分其兵賜諸節度虜人憚隸食諸道據滹沱河叛劉沔坑殺三千人詔回鶻營功德

使在二京者悉冠帶之有司收摩尼書若象燒于道產
貲入之官遏捻可汗裒殘部五千仰食於奚大酋碩舍
朗大中初仲武討奚破之回鶻寢耗滅所存名王貴臣
五百餘轉依室韋仲武諭令羈致可汗等遏捻懼挾妻
葛祿子特勒毒斯馳九騎夜委衆西走部人皆慟哭室
韋七姓析回鶻隸之黠戛斯怒與其相阿播將兵七萬
擊室韋悉收回鶻還磧北遺帳伏山林間狙盜諸蕃自
給稍歸虎特勒是時特勒已自稱可汗居甘州有磧西

諸城宣宗務綏柔荒遠遣使者抵靈州省其酋長回鶻
因遣人隨使者來京師帝即冊拜嗚祿登里邏汨沒蜜
施合俱錄毗伽懷建可汗後十餘年一再獻方物懿宗
時大酋僕固俊自北廷擊吐蕃斬論尚熱盡取西州輪
臺等城使達干米懷王朝且獻俘因請命詔可其後王
室亂貢會不常史亡其傳昭宗幸鳳翔靈州節度使韓
遜表回鶻請率兵赴難翰林學士韓偓曰虜為國讐舊
矣自會昌時伺邊羽翼未成不得逞今乘我危以冀幸

不可開也遂格不報然其國卒不振時時以玉馬與邊州相市云

薛延陀者先與薛種雜居後滅延陀部有之號薛延陀姓一利啞氏在鐵勒諸部最雄張風俗大抵與突厥同西突厥處羅可汗之殺鐵勒諸首也其下往往相率叛去推契苾哥楞為易勿真莫賀可汗據貪汗山奉薛延陀乙失鉢為野啞可汗保燕末山而突厥射匱可汗復彊二部黜可汗號往臣之回紇拔野古阿跌同羅僕骨

白霄在鬱督軍山者東附始畢可汗乙失鉢在金山者
西役葉護可汗貞觀二年葉護死其國亂乙失鉢孫曰
夷男率部帳七萬附頡利可汗後突厥衰夷男反攻頡
利弱之於是諸姓多叛頡利歸之者共推為主夷男不
敢當明年太宗方圖頡利遣遊擊將軍喬師望僂路齋
詔書鼓纛冊拜夷男為真珠毗伽可汗夷男已受命遣
使謝歸方物乃樹牙鬱督軍山直京師西北六千里東
靺鞨西葉護突厥南沙磧北俱倫水地大衆附於是回

紇等諸部莫不伏屬其弟統特勒入朝帝以精刀寶鞭
賜之曰下有太過者以吾鞭鞭之夷男以為寵頡利可
汗之滅塞隧空荒夷男率其部稍東保都尉犍山獨邏
水之陰遠京師纔三千里而羸東室韋西金山南突厥
北瀚海蓋古匈奴地也勝兵二十萬以二子大度設突
利失分將之號南北部七年間使者入朝帝恐後彊大
為患欲產其禍乃下詔拜其二子皆為小可汗十五年
帝以李思摩為可汗始度河牙於漠南夷男惡之未發

方帝幸洛陽將遂封泰山夷男與其下謀曰天子封泰山萬國皆助兵悉會行在邊障空單思摩可取也乃使大度設勒兵二十萬南絕漠壁白道川率一兵得四馬擊思摩思摩走朔州言狀且請師於是詔營州都督張儉統所部與奚霫契丹乘其東朔州道行軍總管李勣衆六萬騎三千營朔州靈州道行軍總管李大亮衆四萬騎五千屯靈武慶州道行軍總管張士貴衆萬七千出雲中涼州道行軍總管李襲譽經略之帝敕諸將曰

延陀度漠馬已疲夫用兵者見利疾進不利亟去今虜
不急擊思摩又不速還勢必敗卿等勿與戰湏其歸可
擊也既而延陀使者來求與突厥平帝曰我約漠以北
延陀制之漠以南突厥專之有輒相掠誅不赦延陀父
事我而首違詔得非亂邪而曰與突厥和乃故約也尚
何請不報大度設次長城思摩已南走大度設度不可
得乃遣人乘長城罵之適會勦兵至行瑳屬天遽率衆
走赤柯度青山然道回遠勦選敢死士與突騎徑臘河

趣白道及大度設尾之不置大度設顧不脫度諾真水
陳以待先是延陀擊沙鉢羅及阿史那社尒皆以徒戰
勝至是却騎不用率五人為伍一執馬四前關今日勝
則騎而逐負者死沒其家以償戰士及戰突厥兵追延
陀騰逐勸救之延陀縱射馬輒死勸乃以步士百人為
隊擣其罅虜潰部將薛萬徹率勁騎先收執馬者故延
陀不能去斬首數千級獲馬萬五千大度設亡去萬徹
追弗及殘卒奔漠北會雪甚衆戰踣死者十八始延陀

能以術禮神致雪冀困勦師及是反自敝云勦還入定
襄天子遣使者齎璽書勞問賞功卹死延陀之使留待
命者帝悉還之曰歸語爾可汗爾自負其彊以突厥為
弱厚誅斂之又取首領以為質且我為天下主渠嘗賦
發於爾邪後有利害當謹思毋遽也延陀乃遣使謝罪
又遣其仲父沙鉢羅獻馬三千因請昏帝曰延陀本一
俟斤我則立之度其力孰與頡利比而敢撓邊乎不許
昏明年以使來益獻馬牛羊橐它固求昏帝與大臣計

曰延陀屈彊朕策顧有二選士十萬擊之使無遺種百年計也絕昏羈縻使無邊憂三十年計也然則孰利房玄齡曰今大亂餘氓瘵破未完戰雖勝猶危道也不如和親帝曰善許以新興公主下嫁召突利失大享羣臣侍陳寶器奏慶善破陳盛樂及十部伎突利失頓首上千萬歲壽詔夷男親迎帝將幸靈州以成昏事夷男大喜詫曰我鐵勒部人耳上以我為可汗公主以女我乘輿為我幸邊誰與我榮乃摻賦諸下羊馬為貲或說夷

男曰可汗與唐皆一國主奈何往朝有如見執尚可悔
夷男曰不然吾聞唐天子有德四方其臣之藉獨留我
磧北亦須有主然舍我而求它非計也下乃不敢言時
帝詔有司受所獻延陀無府庫調斂於下不亟集又度
磧水草乏馬羊多死納貢後期帝亦止行畜口耗死僅
半議者謂夷狄嘗為中國患今禮不具而與昏恐後有
輕中國心乃下詔絕昏謝其使或曰既許之信不可失
帝曰公等計非也昔漢匈奴彊中國不抗故飾子女嫁

單于今北狄弱我能制之而延陀方謹事我者顧新立
倚我以服衆彼同羅僕骨力足制延陀而不發懼我也
我又妻之固中國壻名重而援堅諸部將歸之戎狄野
心能自立則叛矣今絕昏使諸姓聞之將爭擊延陀亡
可待也李思摩果侵掠之延陀遣突利失寇定襄詔李
勣逐出塞俄遣使請率師助伐高麗以刺帝意帝引使
者謂曰歸語爾可汗我父子東征能寇邊者可即來夷
男沮縮不敢謀以使謝固請助軍帝嘉答高麗莫離支

令靺鞨以厚利啗夷男欲與連和夷男氣素索不發亦會病死帝為祭于行始延陀請以庶子曳莽為突利失可汗統東方嫡子拔灼為肆葉護可汗統西方白道之役曳莽實為之謀國人多怨及會莽曳莽亟還部拔灼分兵襲殺之自立為頡利俱利失薛沙多彌可汗方是時王師猶在遼因即寇邊帝遣江夏王道宗屯朔州代州都督薛萬徹與左驍衛大將軍阿史那社尒屯勝州左武侯大將軍薩孤吳仁屯靈州執失思力與突厥掎

角塞下虜知有備乃去拔灼性卞克多殺父時貴臣而
任所親昵國人不安而阿波設與唐使者遇於靺鞨東
鄙小戰不利還怖國人曰唐兵至矣衆大擾諸部遂潰
多彌可汗以十餘騎遁去依阿史那時健俄為回紇所
殺盡屠其宗衆五六萬奔西城立真珠毗伽可汗昆弟
子咄摩支號伊特勿失可汗遣使者上言願保鬱督軍
山帝詔兵部尚書崔敦禮與李勣慰安之俾定其國鐵
勒諸部素伏延陀而咄摩支雖衰孑尚臣畏之帝恐卒

為患詔勳等曰降則撫之叛則擊之勳至咄摩支大駭
陰欲拒戰外好言乞降勳知之縱兵擊斬五千餘級係
老孺三萬遂滅其國咄摩支聞天子使者蕭嗣業在回
紇身詣嗣業丐降入朝拜右武衛將軍賜田宅初延陀
將滅有丐食於其部者延客帳下妻視客人而狼首主
不覺客已食妻語部人共追之至鬱督軍山見二人焉
曰我神也薛延陀且滅追者懼却走遂失之至是果敗
此山下帝以延陀滅欲并契苾等降之復遣道宗率阿

史那社介等分部窮討帝幸靈州節度諸將於是鐵勒
十一部皆歸命天子請吏內屬道宗等徑磧擊延陀餘
衆阿波達干斬首千餘級逐北二百里萬徹抵北道諭
降回紇諸酋虜所遣使踵及帝行在凡數千人上言天
至尊為可汗世世以奴事死不恨帝剖其地為州縣北
荒遂平諸姓有來朝者帝勞曰爾來若鼠得穴魚得泉
我為爾深廣之又曰我在天下四夷有不安安之不樂
樂之如驥尾受蒼蠅可使日千里也於是告功太廟賜

民三日酺後三年餘部叛以右領軍大將軍執失思力
討平之至永徽時延陀部亡散者悉還高宗為置嶠彈
州處安之

拔野古一曰拔野固或為拔曳固漫散磧北地千里直
僕骨東隣于靺鞨帳戶六萬兵萬人地有薦草產良馬
精鐵有川曰康干河斷松投之三年輒化為石色蒼緻
然節理猶在世謂康干石者俗嗜獵射少耕獲乘木逐
鹿冰上風俗大抵鐵勒也言語少異貞觀三年與僕骨

同羅奚雷同入朝二十一年大俟利發屈利失舉部內
屬置幽陵都督府拜屈利失右武衛大將軍即為都督
顯慶時與思結僕固同羅叛以左武衛大將軍鄭仁泰
擊之斬其渠首至天寶間能自來朝

僕骨亦曰僕固在多覽葛之東帳戶三萬兵萬人地最
北俗梗驚難召率始臣突厥後附薛延陀延陀滅其酋
娑匐俟利發歌濫拔延始內屬以其地為金微州拜歌
濫拔延為右武衛大將軍徵州都督開元初為首領僕

固所殺詣朔方降有司誅之子曰懷恩至德時以功至朔方節度使自有傳

同羅在薛延陀北多覽葛之東距京師七千里而羸勝兵三萬貞觀二年遣使者入朝久之請內屬置龜林都督府拜酋俟利發時健啜為左領軍大將軍即授都督安祿山反劫其兵用之號曳落河者也曳落河猶言健兒云

渾在諸部最南者突厥頡利敗時有俟利發阿貪支款

塞薛延陀之滅大俟利發渾汪舉部內向以其地為臯
蘭都督府後分東西州太宗以阿貪支於汪屬尊遣譯
者諷汪汪欣然避位帝嘉其讓以阿貪支為右領軍衛
大將軍臯蘭州刺史汪雲麾將軍兼俟利發為之副阿
貪支死子回貴嗣回貴死子大壽嗣大壽死子釋之嗣
釋之鷙勇不凡從哥舒翰拔石堡城遷右武衛大將軍
封汝南郡公李光弼保河陽釋之以朔方都知兵馬使
為裨將進寧朔郡王知朔方節度留後僕固懷恩之走

聲為歸鎮釋之曰是必衆潰將拒之其甥張韶曰彼如悔禍還鎮渠可不納釋之信之乃納懷恩懷恩已入使韶殺釋之收其軍已而惡韶罵曰若負舅肯忠於我折其脛囚死彌戕城釋之子城建中功臣也自有傳

契苾亦曰契苾羽在焉耆西北鷹娑川多覽葛之南其酋哥楞自號易勿真莫賀可汗弟莫賀咄特勒皆有勇莫賀咄死子何力尚紐率其部來歸時貞觀六年也詔處之甘涼間以其地為榆溪州永徽四年以其部為賀

蘭都督府隸燕然都護何力有戰功忠節臣也太和中其種帳附於振武云

多覽葛亦曰多濫在薛延陀東濱同羅水勝兵萬人延陀已滅其酋侯斤多濫葛末與回紇皆朝以其地為燕然都督府授右衛大將軍即為府都督死以多濫葛塞匐為大俟利發繼為都督

阿跌亦曰訶咥或為趺跌始與拔野古等皆朝以其地為雞田州開元初趺跌思泰自突厥默啜所來降其後

光進光顏皆以戰功至大官賜李氏附屬籍自有傳
葛邏祿本突厥諸族在北庭西北金山之西跨僕固振
水包多怛嶺與車皐部接有三族一謀落或為謀刺二
熾俟或為婆匐三踏實力永徽初高侃之伐車皐可汗
三族皆內屬顯慶二年以謀落部為陰山都督府熾俟
部為大漠都督府踏實力部為玄池都督府即用其酋
長為都督後分熾俟部置金附州三族當東西突厥間
常視其興衰附叛不常也後稍南徙自號三姓葉護兵

疆甘於闐延州以西諸突厥皆畏之開元初再來朝天
寶時與回紇拔悉蜜共攻殺烏蘇米施可汗又與回紇
擊拔悉蜜走其可汗阿史那施於北庭奔京師葛祿與
九姓復立回紇葉護所謂懷仁可汗者也於是葛祿之
處烏德健山者臣回紇在金山北庭者自立葉護歲來
朝久之葉護頓毗伽縛突厥叛酋阿布思進封金山郡
王天寶間凡五朝至德後葛邏祿寢盛與回紇爭疆徙
十姓可汗故地盡有碎葉怛邏斯諸城然限回紇故朝

會不能自達于朝

拔悉蜜貞觀二十三年始來朝天寶初與回紇葉護擊殺突厥可汗立拔悉蜜大酋阿史那施為賀臘毗伽可汗遣使者入謝玄宗賜紫文袍金鈿帶魚袋不三歲為葛邏祿回紇所破奔北廷後朝京師拜左武衛將軍地與衆歸回紇

都播亦曰都波其地北瀕小海西堅昆南回紇分三部皆自統制其俗無歲時結草為廬無畜牧不知稼穡土

多百合草掇其根以飯捕魚鳥獸食之衣貂鹿皮貧者
緝鳥羽為服其昏姻富者納馬貧者效鹿皮草根死以
木匱斂置山中或系于樹送葬哭泣與突厥同無刑罰
盜者倍輸其贓貞觀二十一年因骨利幹入朝亦以使
通中國

骨利幹處瀚海北勝兵五千草多百合產良馬首似橐
它筋骼壯大日中馳數百里其地北距海去京師最遠
又北度海則晝長夜短日入烹羊胛熟東方已明蓋近

日出處也既入朝詔遣雲麾將軍康蘇蜜勞答以其地
為玄闕州其大酋俟斤因使者獻馬帝取其異者號十
驥皆為美名曰騰霜白曰皎雪驄曰凝露驄曰縣光驄
曰決波驄曰飛霞驄曰發電赤曰流金馭曰翔麟紫曰
奔虹赤厚禮其使龍朔中以玄闕州更為余吾州隸瀚
海都督府延載初亦來朝

白霄居鮮卑故地直京師東北五千里與同羅僕骨接
避薛延陀保輿支水冷陁山南契丹北烏羅渾東靺鞨

西拔野古地圖表二千里山繚其外勝兵萬人業射獵以赤皮緣衣婦貫銅釧以子鈴綴襟其部有三曰居延曰無若沒曰潢水其君長臣突厥頡利可汗為俟斤貞觀中再來朝後列其地為真顏州以別部為居延州即用俟斤為刺史顯慶五年授酋長李含珠為居延都督含珠死弟厥都繼之後無聞焉

斛薛處多濫葛北勝兵萬人奚結處同羅北思結在延陀故牙二部合兵凡二萬既來朝列其地州縣之太宗

時北狄能自通者又有烏羅渾或曰烏洛侯曰烏羅護
直京師東北六千里而羸東靺鞨西突厥南契丹北烏
丸大抵風俗皆靺鞨也烏丸或曰古丸又有鞠或曰穢
居拔野古東北有木無草地多苔無羊馬人豢鹿若牛
馬惟食苔俗以駕車又以鹿皮為衣聚木作屋尊卑共
居又有俞折者地差大俗與拔野古相埒少羊馬多貂
鼠又有駁馬者或曰弊刺曰遏羅支直突厥之北距京
師萬四千里隨水草然喜居山勝兵三萬地常積雪木

不凋以馬耕田馬色皆駁因以名國云北極於海雖畜馬而不乘資湏酪以食好與結骨戰人貌多似結骨而語不相通皆鬻髮樺皮帽構木類并幹覆樺為室各有小君長不能相臣也大漢者處鞠之北饒羊馬人物頗大故以自名與鞠俱隣於黠戛斯劒海之瀕此皆古所未賓者當貞觀逮永徽奉貂馬入朝或一再至

黠戛斯古堅昆國也地當伊吾之西焉耆北白山之旁或曰居勿曰結骨其種雜丁零乃匈奴西鄙也匈奴封

漢降將李陵為右賢王衛律為丁零王後郅支單于破
堅昆于時東距單于廷七千里南車師五千里郅支留
都之故後世得其地者訛為結骨稍號紇骨亦曰紇
斯云衆數十萬勝兵八萬直回紇西北三千里南依貪
漫山地夏沮洳冬積雪人皆長大赤髮皙面綠瞳以黑
髮為不祥黑瞳者必曰陵苗裔也男少女多以環貫耳
俗趨伉男子有勇黥其手女已嫁黥項雜居多淫佚謂
歲首為茂師哀以三哀為一時以十二物紀年如歲在

寅則曰虎年氣多寒雖大河亦半冰稼有禾粟大小麥
青稞步磴以為麪糜糝以二月種九月獲以飯以釀酒
而無果蔬畜馬至壯大以善鬪者為頭馬有橐它牛羊
牛為多富農至數千其獸有野馬骨咄黃羊獬羝鹿黑
尾黑尾者似麀尾大而黑魚有蔑者長七八尺莫痕者
無骨口出頤下鳥鴈鶩鳥鵲鷹隼木松樺榆柳蒲松高
者仰射不能及顛而樺尤多有金鐵錫每雨俗必得鐵
號迦沙為兵絕犀利常以輸突厥其戰有弓矢旗幟其

騎士析木為盾蔽股足又以圓盾傳肩可捍矢刃其君
曰阿熱遂姓阿熱氏建一纛下皆尚赤餘以部落為之
號服貴貂貉阿熱冬帽貂夏帽金釰銳頂而卷末諸下
皆帽白氊喜佩刀礪賤者衣皮不帽女衣毳毼錦罽綾
蓋安西北廷大食所貿售也阿熱駐牙青山周柵代垣
聯氊為帳號密的支它首領居小帳凡調兵諸部役屬
者悉行內貂鼠青鼠為賦其官宰相都督職使長史將
軍達干六等宰相七都督三職使十皆典兵長史十五

將軍達干無員諸部食肉及馬酪惟阿熱設餅餌樂有
笛鼓笙觱篥盤鈴戲有弄駝師子馬伎繩伎祠神惟主
水草祭無時呼巫為甘昏嫁納羊馬以聘富者或百千
計喪不務面三環尸哭乃火之收其骨歲而乃墓然後
哭泣有節冬處室木皮為覆其文字言語與回鶻正同
法最嚴臨陳撓奉使不稱妄議國若盜者皆斷首子為
盜以首著父頸非死不脫阿熱牙至回鶻牙所索它四
十日行使者道出天德右二百里許抵西受降城北三

百里許至鵲鵲泉泉西北至回鶻牙千五百里許而有東西二道泉之北東道也回鶻牙北六百里得仙娥河河東北曰雪山地多水泉青山之東有水曰劔河偶艇以度水悉東北流經其國合而北入于海東至木馬突厥三部落曰都播彌列哥餓支其酋長皆為頡斤樺皮覆室多善馬俗乘木馬馳冰上以板藉足屈木支腋蹴輒百步勢迅激夜鈔盜晝伏匿堅昆之人得以役屬之堅昆本彊國也地與突厥等突厥以女妻其酋豪東至

骨利幹南吐蕃西南葛邏祿始隸薛延陀延陀以頡利
發一人監國其酋長三人曰訖悉鞏曰居沙波鞏曰阿
米鞏共治其國未始與中國通貞觀二十二年聞鐵勒
等已入臣即遣使者獻方物其酋長俟利發失鉢屈阿
棧身入朝太宗勞享之謂羣臣曰往渭橋斬三突厥自
謂功多今俟利發在席更覺過之俟利發酒酣奏願得
持笏帝以其地為堅昆府拜俟利發左屯衛大將軍即
為都督隸燕然都護高宗世再來朝景龍中獻方物中

宗引使者勞之曰而國與我同宗非它蕃比屬以酒使
者頓首玄宗世四朝獻乾元中為回紇所破自是不能
通中國後狄語訛為黠戛斯蓋回鶻謂之若曰黃赤面
云又訛為戛戛斯然常與大食吐蕃葛祿相依仗吐蕃
之往來者畏回鶻剽鈔必住葛祿以待黠戛斯護送大
食有重錦其載二十橐它乃勝既不可兼負故裁為二
十匹每三歲一餉黠戛斯而回鶻授其君長阿熱官為
毗伽頓頡斤回鶻稍衰阿熱即自稱可汗其母突厥施

女也為母可敦妻葛祿葉護女為可敦回鶻遣宰相伐
之不勝拏關二十年不解阿熱恃勝乃肆言曰爾運盡
矣我將收爾金帳於爾帳前馳我馬植我旗爾能抗亟
來即不能當疾去回鶻不能討其將句錄莫賀導阿熱
破殺回鶻可汗諸特勒皆潰阿熱身自將焚其牙及公
主所廬金帳者回鶻可汗常坐也乃悉收其實貲并得
太和公主遂徙牙牢山之南牢山亦曰賭蒲距回鶻舊
牙度馬行十五日阿熱以公主唐貴女遣使者衛送公


主還朝為回鶻烏介可汗邀取之并殺使者會昌中阿
熱以使者見殺無以通于朝復遣注吾合素上書言狀
注吾虜姓也合言猛素者左也謂武猛善左射者行三
歲至京師武宗大悅班渤海使者上以其處窮遠能修
職貢命太僕卿趙蕃持節臨慰其國詔宰相即鴻臚寺
見使者使譯官考山川國風宰相德裕上言貞觀時遠
國皆來中書侍郎顏師古請如周史臣集四夷朝事為
王會篇今黠戛斯大通中國宜為王會圖以示後世有

詔以鴻臚所得續著之又詔阿熱著宗正屬籍是時烏
介可汗餘衆託黑車子阿熱願乘秋馬肥擊取之表天
子請師帝令給事中劉濛為巡邊使朝廷亦以河隴四
鎮十八州久淪戎狄幸回鶻破弱吐蕃亂相殘齧可乘
其衰乃以右散騎常侍李拭使黠戛斯冊君長為宗英
雄武誠明可汗未行而武宗崩宣宗嗣位欲如先帝意
或謂黠戛斯小種不足與唐抗詔宰相與臺省四品以
上官議皆曰回鶻盛時有冊號今幸衰亡又加黠戛斯

後且生患乃止至大中元年卒詔鴻臚卿李業持節冊
黠戛斯為英武誠明可汗逮咸通間三來朝然卒不能
取回鶻後之朝聘冊命史臣失傳

贊曰夷狄資悍貪人外而獸內惟剽奪是視故湯武之
興未嘗與其功蓋疏而不戚也太宗初興嘗用突厥矣
不勝其暴卒縛而臣之肅宗用回紇矣至略華人辱太
子笞殺近臣求索無倪德宗又用吐蕃矣劫平涼敗上
將空破西陲所謂引外禍平內亂者也夫用之以權制

之以謀惟太宗能之若二主懦昏狃而狎之烏勝其弊哉彼親之則責償也多慊而不滿則滋怨化以仁義則頑示以法則忿熟我險易則為患也博而慘療餒以野葛何時可哉故春秋許夷狄者不一而足信矣



唐書卷二百十七下

唐書卷二百十七下考證

回鶻傳下敬宗即位之年○

臣酉

按敬宗紀在寶曆元

年五月

思忠思貞思義思禮○舊書作思恩思愛無思義思禮

唐書卷二百十七下考證

欽定四庫全書

史部

唐書卷二百十八

三
二十

詳校官編修臣錢樾

洗馬臣王坦修覆勘

覆校官庶吉士臣徐立綱

校對官中書臣陳林

膳錄舉人臣史堂

欽定四庫全書

唐書卷一百十八

宋端明殿學士 宋祁撰

列傳第一百四十三

沙陀

沙陀西突厥別部處月種也始突厥東西部分治烏孫
故地與處月處蜜雜居貞觀七年太宗以鼓纛立利娑
吐陸可汗而族人步真觐望謀并其弟彌射乃自立彌

射懼率處月等入朝而步真勢窮亦歸國其留者咄陸以射匱特勒劫越之子賀魯統之西突厥寢疆內相攻其大酋乙毗咄陸可汗建庭鏃曷山之西號北庭而處月等又隸屬之處月居金娑山之陽蒲類之東有大磧名沙陀故號沙陀突厥云咄陸寇伊州引二部兵圍天山安西都護郭孝恪擊走之拔處月俟斤之城後乙毗可汗敗奔吐火羅賀魯來降詔拜瑤池都督徙其部廷州之莫賀城處月朱邪闕俟斤阿厥亦請內屬永徽初

賀魯反而朱邪孤注亦殺招慰使連和引兵據牢山於是射脾俟斤沙陀那速不肯從高宗以賀魯所領授之明年弓月道總管梁建方契苾何力引兵斬孤注俘九千人又明年廢瑶池都督府即處月地置金滿沙陀二州皆領都督賀魯亡安撫大使阿史那彌射次伊麗水而處月來歸乃置崑陵都護府統咄陸部以彌射為都護龍朔初以處月酋沙陀金山從武衛將軍薛仁貴討鐵勒授墨離軍討擊使長安二年進為金滿州都督累

封張掖郡公金山死子輔國嗣先天初避吐蕃徙部北
廷率其下入朝開元二年復領金滿州都督封其母鼠
尼施為鄯國夫人輔國累爵永壽郡王死子骨咄支嗣
天寶初回紇內附以骨咄支兼回紇副都護從肅宗平
安祿山拜特進驍衛上將軍死子盡忠嗣累遷金吾衛
大將軍酒泉縣公至德寶應間中國多故北廷西州閉
不通朝奏使皆道出回紇而虜多漁擷尤苦之雖沙陀
之倚北廷者亦困其暴歛貞元中沙陀部七千帳附吐

蕃與其寇北廷陷之吐蕃徙其部甘州以盡忠為軍大
論吐蕃寇邊常以沙陀為前鋒久之回鶻取涼州吐蕃
疑盡忠持兩端議徙沙陀于河外舉部愁恐盡忠與朱
邪執宜謀曰我世為唐臣不幸陷污今若走蕭關自歸
不愈於絕種乎盡忠曰善元和三年悉衆三萬落循烏
德韃山而東吐蕃追之行且戰旁洮水秦石門轉關不
解部衆略盡盡忠死之執宜裒瘡傷士裁二千騎七百
雜畜橐它千計歟靈州塞節度使范希朝以聞詔處其

部鹽州置陰山府以執宜為府兵馬使沙陀素健關希朝欲藉以捍虜為市牛羊廣畜牧休養之其童耄自鳳翔興元太原道歸者皆還其部盡忠弟葛勒阿波率殘部七百叩振武降授左武衛大將軍兼陰山府都督執宜朝長安賜金幣袍馬萬計授特進金吾衛將軍然議者以靈武迫吐蕃恐後反覆生變又濱邊益口則食翔價頃之希朝鎮太原因詔沙陀舉軍從之希朝乃料其勁騎千二百號沙陀軍置軍使而處餘衆于定襄川執

宜乃保神武川之黃花堆更號陰山北沙陀是時天子
伐鎮州執宜以軍七百為前鋒王承宗衆數萬伏木刀
溝與執宜遇飛矢雨集執宜提軍橫貫賊陳鏐闕李光
顏等乘之斬首萬級鎮兵解進蔚州刺史王鐸節度太
原建言朱邪族孽熾散居北川恐啓野心願析其族隸
諸州勢分易弱也遂建十府以處沙陀八年回鶻過磧
南取西城柳谷詔執宜屯天德明年伐吳元濟又詔執
宜隸李光顏破蔡人時曲拔凌雲柵元濟平授檢校刑

部尚書猶隸光顏軍長慶初伐鎮州悉發沙陀與易定
軍掎角破賊深州執宜入朝留宿衛拜金吾衛將軍太
和中柳公綽領河東奏陞北沙陀素為九姓六州所畏
請委執宜治雲朔塞下廢府十一料部人三千禦北邊
號代北行營授執宜陰山府都督代北行營招撫使隸
河東節度執宜死子赤心嗣開成四年回鶻徑磧口抵
榆林塞宰相掘羅勿以良馬三百遺赤心約共攻彰信
可汗可汗死節度使劉沔以沙陀擊回鶻于殺胡山久

之伐潞誅劉稹詔赤心率代北騎軍三千隸石雄為前軍破石會闕助王宰下天井合太原軍次榆社與監軍使呂義忠禽楊弁潞州平遷朔州刺史仍為代北軍使大中初吐蕃合党項及回鶻殘衆寇河西太原王宰統代北諸軍進討沙陀常深入寇諸軍赤心所向虜輒披靡曰吾見赤馬將軍火生頭上始沙陀臣吐蕃其左老右壯溷男女略與同而馳射趨悍過之虜倚其兵常苦邊及歸國吐蕃繇此亦衰宣宗已復三州七關征西戍

皆罷乃遷赤心蔚州刺史雲州守捉使龐勛亂詔義成
康承訓為行營招討使赤心以突騎三千從承訓兵絕
渾水遇伏隋園中幾沒赤心以騎五百掀出之勛欲速
戰衆八萬短兵接赤心勒勁騎突賊與官軍夾擊敗之
其弟赤衷以千騎追之毫東勛平進大同軍節度使賜
氏李名國昌預鄭王屬籍賜親仁里甲第回鶻寇榆林
擾靈鹽詔國昌為鄜延節度使又寇天德乃徙節振武
進檢校司徒王仙芝陷荆襄朝廷發諸州兵討捕國昌

遣劉遷統雲中突騎逐賊數有功乾符三年段文楚為
代北水陸發運雲州防禦使是時無年文楚損用度
下皆怨邊校程懷信王行審蓋寓李存璋薛鐵山康君
立等曹議曰世多難丈夫當投鐔立功段公乃儒者難
共計沙陀雄勁李振武父子勇冠軍我若推之無不應
則代北唾手可定拾取富貴若何咸曰善乃夜謁國昌
子雲中守捉使克用曰歲艱稟食削吾等不忍餓死公
家威德著聞請誅虐帥安部內克用許之募得士萬人

趨雲州次關鷄臺城中執文楚至殺之據州以聞其丐
克用為大同防禦留後不許發諸道兵進捕諸道不甚
力而黃巢方引度江朝廷度未能制乃赦之以國昌為
大同軍防禦使國昌不受命詔河東節度使崔彥昭幽
州張公素共擊之無功國昌與党項戰未決大同川吐
渾赫連鐸襲振武盡取其貲械國昌窮挈騎五百還雲
州州不納鐸遂取之克用轉側蔚朔間裒兵纔三千屯
新城鐸引萬人圍之隧而攻三日不拔鐸兵殺傷甚國

昌自蔚州來鐸引去僖宗以鐸領大同節度畀討國昌
六年詔昭義李鈞為北面招討使督潞太原兵屯代州
幽州李可舉會鐸攻蔚州國昌以一隊當之克用分兵
抵遮虜城拒鈞天大雪士瘁仆鈞衆潰還代州軍遂亂
鈞死于兵廣明元年以李琢為蔚朔招討都統率兵數
萬屯代州克用使傅文達調蔚朔兵朔州刺史高文集
縛以送琢琢進攻蔚州國昌敗與克用舉宗奔達靼鐸
密畀酋長圖之克用得其計因豪桀大會馳射百步外

針芒木葉無不中部人大驚即倡言今黃巢北寇為中原患一日天子赦我願與公等南向定天下庸能終老沙磧哉達旦知不留乃止巢攻潼關入京師詔河東監軍陳景思發代北軍時沙陀都督李友金屯興唐軍薩葛首領米海萬安慶都督史敬存屯感義軍克用客塞下衆數千無所屬景思聞天子西乃與友金料騎五千入居絳兵擅劫帑自私還代州益募士三萬屯隴西士囂縱友金不能制謀曰今合大衆不得威名宿將且無

功吾兄司徒父子材而雄衆所推畏比得罪于朝僑戍
北部不敢還今若召之使將兵代北豪英一呼可集整
行伍鼓而南賊不足平也景思曰善乃丐赦國昌使討
賊贖罪有詔拜克用代州刺史忻代兵馬留後促本軍
討賊克用募達靼萬人趨代州將南道太原節度使鄭
從讜塞石嶺關不得前克用僂道至太原營城下五日
邀糧貲從讜不答乃大略還屯代州中和二年蔚州刺
史蘇祐會赫連鐸兵將攻代州克用率騎五百先襲蔚

州下之祐屯美女谷鐸與幽州李可舉衆七萬攻蔚州
譙柵相屬克用直擣營入蔚州燔府庫棄而去屯鴈門
國昌自達靼率兵歸代州擾汾并樓煩不釋鎧帝詔克
用還軍朔州於是義武節度使王處存河中節度使王
重榮傳詔招克用同討巢克用喜即大閱鴈門得忻代
蔚朔達靼衆三萬騎五千而南於是國昌守代州鄭從
謹不肯假道克用軍傳太原而營奉幣馬遺從謹身從
數騎呼曰我且西願與公一言從謹升陴慰勉歸貨幣

饗餼克用乃自陰地趨晉會河中帝聞擢克用鴈門節度神策天寧軍鎮遏忻代觀察使明年宰相王鐸承制授克用東北面行營都統河東監軍陳景恩為監軍使克用使弟克脩領彀騎五百度河克用自夏陽濟留薛阿檀扼津口次同州壁乾阬與賊戰梁田坡敗之進壁渭橋遂收京師功第一進同中書門下平章事隴西郡公國昌為代北軍節度使未幾以克用領河東節度黃巢與秦宗權合寇河南四年克用率河東代北兵將自

澤潞下天井關河陽諸葛爽堙井以拒克用乃繇河中
濟趨許州合徐汴兵破尚讓于太康戰西華又破之賊
走河南平追北曹州還過汴朱全忠邀之克用留兵于
郊入舍上源館夜帳飲全忠自佐饗進貲寶掘手諄勞
是時全忠忌克用桀邁難制則連車外環陳兵道左右
克用醉乃攻館下拒戰親將郭景銖滅燭扶克用徐告
之尚被酒乃引弓射會煙囂四合大震電克用與薛志
勤等間關升南譙門縋走營部下死者數百人所獲賊

乘輿物盡亡之克用整衆歸太原益訓兵將報讐使弟
克勤以萬騎屯河中乃請擊全忠使者八返内外震恐
帝使內謁慰解尋進位檢校太傅隴西郡王光啓元年
幽州李可舉鎮州王景崇言易定故燕趙境請取分之
於是可舉攻易州下之景崇攻無極易定節度使王處
存求救於克用克用自將救無極敗鎮人攻馬頭固新
城鎮兵走處存復取易州鳳翔李昌符邠寧朱玫與全
忠連和觀軍容使田令孜惡克用與王重榮合建言不

可處近輔請授王處存河中而徙重榮於易定則克用孤矣帝從之重榮以告克用怒曰我當從公提鼓出汜水關誅全忠迴殲穴鼠耳重榮計曰公兵朝出關則邠岐兵夕傳吾堞願先治邠岐克用乃表言玫昌符連全忠為亂請以兵十五萬度河梟二豎然後平汴雪大耻願陛下戒嚴無為賊所搖帝遣使慰止背相望也克用不奉詔玫亦引邠鳳兵營沙苑克用薄戰玫敗夜亡去克用還河中天子出趣鳳翔道傳兵且至即超寶鷄克

用與重榮聯章請還宮願留兵衛京師即還鎮帝懼走
大散關駐興元克用引歸嗣襄王煚偽詔至太原克用
燔之執其使間道奉表興元始朝廷意玫結克用迫乘
輿及表至示羣臣因騰曉山南諸鎮行在少安王行瑜
斬玫克用以千騎經略京畿三年國昌卒俄而昭宗即
位進克用檢校太師兼侍中大順初克用自攻赫連鐸
於雲州拔東郭幽州李匡威以兵三萬救之殺其將安
金俊克用走鐸與匡威共建言山南亂克用實首之今

乘其敗可伐而取也全忠亦請與河北三鎮共討之宰相張濬是其計乃下制削克用官爵屬籍以濬為兵馬招討制置宣慰使京兆尹孫揆副之樞密使駱全諲為行營都監華州節度使韓建為行營馬步都虞候兼供軍糧料使王鎔領河東東面全忠南面李匡威北面竝為行營招討使鐸副匡威先薄戰克用追潞兵不肯行共殺守將李克恭送款于汴獻首闕下更詔揆為昭義節度使克用將李存孝邀揆長子殺之匡威鐸并吐蕃

黠憂斯衆十萬攻遮虜軍殺其將劉胡子克用乃屯渾
河川存孝與鐸戰樂安鐸敗走濬入陰地關壁汾隰薛
鐵山李承嗣營洪洞迎戰存孝次趙城韓建夜出壯士
三百乘其營存孝伏以待建兵大奔存孝攻絳州未下
晉州刺史張行恭棄城走建與濬遁還明年克用奉表
自陳乃復拜檢校太師守中書令隴西郡王克用悉兵
攻鐸雲州以騎將薛阿檀為前軍設伏河上鐸縱騎追
阿檀遇伏而奔鐸亡入吐渾克用取雲州以部將石善

友為刺史大同軍防禦使景福初鎮州王鎔攻堯山克
用使李嗣勳擊之斬級三萬克用遂拔天長略常山度
滹沱燔其郭徇地至趙取鼓藁二城赫連鐸衆八萬攻
天城軍克用飛檄發軍太原匡威已壁雲州北郊克用
自神堆引軍夜入雲州死戰走之乾寧元年克用次新
城鐸膝行詣軍門降克用鞭而縱之進下武州攻新州
李匡籌引步騎七萬救之克用迎戰斬首萬級俘少將
三百徇城下新州降取媯州匡籌棄幽州走明年幽州

降克用以劉仁恭為留後乃旋王行瑜韓建李茂貞連兵南關下殺李谿克用盡調北部兵度河拔絳州斬刺史王瑤次河中王珂謁于道同州王行約奔京師圍韓建于華州京師震動帝為幸石門莎城遣內謁郝延昱慰勞且言茂貞屯盤屋行瑜屯興平克用乃進營渭橋帝以嗣延王戒丕嗣丹王允詔克用擊邠鳳克用奉詔屯渭北遣史儼以驃騎三千護石門且令王珂輸河中粟備行在帝以赤詔嘉答進克用諸道兵馬都招討使

命二嗣王兄事之令促討行瑜克用請帝還京師以二千騎衛乘輿時宮室煨殘駐尚書省百官喪馬克用進乘輿金貝裝二駟又上百乘給從官進太師兼中書令邠寧四面行營都統行瑜堅壁梨園茂貞自率師三萬逼咸陽而屯克用請帝責茂貞罷兵因削官爵願與河中共討之帝詔第事行瑜貸茂貞俾結好朱詔賜魏國夫人陳氏陳襄陽人也善書帝所愛欲急平賊故予之茂貞以兵援龍泉克用使李罕之李存審夜引兵劫其

餉援兵亡行瑜潰而走追殺萬計行瑜入邠州丐歸歟
克用使史儼入其城行瑜死慶州傳首京師帝悉論幕
府官屬及諸子功封爵之克用賜號忠貞平難功臣進
封晉王克用屯雲陽遣李習吉入朝且請與王珂悉力
討茂貞帝不許克用私於使者曰叛根不除憂未艾也
天子發度支錢三十萬緡勞其軍時鄆州朱宣兄弟為
全忠所困使來告克用請道于魏救之兵解復關克用
自將而往使李存信率兵三萬與史儼等次于莘為魏

兵所破克用怒大略相魏去始茂貞畏克用見討脩貢
獻如藩臣及克用還絕貢獻與韓建謀以兵入朝帝懼
詔克用進衛京師帝謀度河幸太原遣延王入克用軍
促迎天子既次渭北建固請幸華州克用謂王曰患本
於不斷顧上自為之李存信攻魏葛從周引衆三萬來
援戰洹水上汴人夜坎諸野闕合克用子落落馬陷而
顛克用救之亦顛追兵迫射之乃免存信已傳魏城克
用并力羅弘信以捉生逆戰為克用所敗追及郭昫闔

而還於是陝州王珙攻河中李嗣昭援珂再戰再勝珙
圍解帝使延王持節至太原謂克用曰不用卿計故逮
此無可言者今我寄於華百司羣官無所託非卿尚誰
與憂不則不復見宗廟矣王至太原克用留累月每大
張飲王必以舞屬克用因陳國事涕數行下冀感動之
時劉仁恭據幽州貳于克用數召兵不應克用以書讓
之仁恭得書抵于地遂顯絕故克用內憂幽州以好辭
謝王不復有西意俄自將屯蔚州會晨大霧冥仁恭來

薄戰克用大敗走太原大將多死全忠奪邢磁洺三州
茂貞度克用沮撓無能出師乃與韓建謾好致書言帝
暴露累年請共治宮室迎天子初長安自石門之奔宮
殿焚圯及岐人再逆火閭里皆盡宮城昏夜狐狸鳴啼
無人跡帝幸華西溪望舊京必泣然流涕左右悽塞不
得語王建方盜兩川茂貞欲披其鄙私之數南師不暇
東而全忠繕治洛陽茂貞因約克用共其勞克用辭窮
乃出貲為助光化初帝還京師詔克用與全忠解讐宰

相徐彥若崔胤皆勸之克用勢已折然尚以功高位全忠上恥先下之時王鎔方睦於汴乃遣書鎔使為己倡全忠即遣使奉書幣恭甚克用亦報之然汴日益張窮關不置王珙請汴兵攻河中克用使李嗣昭張漢瑜援之汴兵走葛從周取承天軍民叔琮取遼州樂平進壁榆次克用使周德威逐出之李嗣昭以步騎三萬下太行略河內拔懷州進攻河陽汴人閻寶救之嗣昭退保懷天復元年全忠取晉絳逼河中王珂告急使相望汴

人扼空道晉兵不得前進虜珂珂妻克用女不能救全忠遂有河中克用朝貢道亦梗全忠知克用迄不振乃大舉攻太原分遣銳將氏叔琮等率魏博兗鄆邢洺義武晉絳兵環入之晉城邑多下會大雨汴兵糧乏士瘡癘遂解克用雖內憤悵憚全忠彊難與爭乃厚致幣馬謝復請脩好全忠遂取同華屯渭上帝如鳳翔李茂貞韓全誨請召克用入衛克用間道遣使者奔問并詒書全忠勸還汴全忠不答克用率兵趨平陽攻吉上堡破

汴軍於晉州李嗣昭周德威下慈隰進屯河中汴將朱友寧以兵十萬壁其南全忠自屯晉州晉人聞全忠至皆失色時有虹貫德威營氏叔琮薄壘疾鬪晉兵大敗仗械輜儲皆盡友寧長驅略汾慈隰州皆下遂圍太原攻西門德威嗣昭循山挈餘衆得歸克用大恐身荷版築率士拒守陰與嗣昭德威謀奔雲州李存信曰不如依北蕃國昌妻劉語克用曰聞王欲委城入蕃審乎計誰出曰存信等為此劉曰彼牧羊奴安辦遠計王常笑

王行瑜失城走而死若何倣之且王頃居達靼危不免必一朝去此禍不旋跬渠能及北虜哉克用悟乃止居數日散士復集嗣昭夜擾友寧營汴人驚引去德威追之抵白壁關復收慈隰汾三州三年克用攻晉州聞帝自鳳翔還京師乃去雲州都將王敬暉殺刺史劉再立以地予劉仁恭李嗣昭討之仁恭援敬暉嗣昭壁樂安欲戰仁恭取敬暉棄城去帝東遷詔至太原克用泣謂其下曰乘輿不復西矣遣使者奔問行在俄加號協盟

同力功臣李茂貞王建與邠州楊崇本遣使者來約義
舉克用顧藩鎮皆附汴不可與共功惟契丹阿保機尚
可用乃卑辭召之保機身到雲中與克用會約為兄弟
留十日去遺馬千匹牛羊萬計期冬大舉度河會昭宗
弒而止四年王建李茂貞約克用大舉建將康晏步騎
二萬與克用監軍張承業會鳳翔是時汴將王重師守
長安劉知俊守同州與戰長安西建兵敗遂不振唐亡
建與淮南楊渥請克用自王一方湏賊平訪唐宗室立

之建請悉蜀工制乘輿御物克用答曰自王非吾志也
建又勸茂貞王岐茂貞孱褊亦不敢當但侈府第僭宮
禁而已建渥乃自王是歲克用有疾城門自壞明年卒
贊曰沙陀始歸命天子仰哺于邊世喋血助征討常為
邊兵雄至克用逢王室亂遂有太原虜性惇固少它腸
自負材果欲經營天下而不克也兵雖勝然數敗地雖
得輒復失故熟視帝劫遷縮頸羞汗偷景待僵不亦鄙
乎賴其子慄銳抑而復振是時提兵託勤王者五族然

卒亡朱氏為唐滌耻者沙陀也使克用稍知古今能如
齊桓晉文唐遽亡乎哉

唐書卷二百十八